

高安縣志

高安縣志卷之九

兵防志

兵制

兵事

衛民以兵干城永賴負耒荷戈邱乘紀載戎馬芻糧豫備無害訓練時勤亦威亦愛有勇知方河山礪帶共樂太平奠安內外

志兵防

國家有百年不用之兵而無一日不豫之備高安爲附郭首邑從前未設衛所止立高安營哨官一員哨房一所在察院公署之右哨官糧餉火藥心紅馬料共銀五十九兩三錢管精兵一百八十八名內傳號識字各一名哨總二名隊長十名出守銅鼓四十八名巡視斗角灘二十名餘一百六名在營防守城池團練差操每名

高安縣志

卷之九

兵防

一

歲支工食銀八兩九錢常兵三百四十二名內防守羊腦寨十名石鼻哨五名機總四十名識字兵一名餘二百八十六名在營差操每名歲支工食銀五兩二錢又立習牙哨哨房一所在清江界防守哨官一員糧餉每日支銀一錢一分五釐歲支馬料火藥心紅銀十兩管精兵一百名內哨總二名隊長十名餘兵八十八名操練防守每名歲支工食銀八兩九錢至明末各屬增設營衛崇正七年始建瑞州營于瑞豐倉地設有頭門二門正堂一重東西兩廊各四間內堂三間廚房一所內房五間初設把總一員繼設哨官三員爲左右中營分統前兵崇正十三年易把總爲守備哨官之職仍舊此

瑞營之始制也迨

國朝順治六年新定經制載部選守備一員把總一員馬戰兵六十名官馬六十四步戰兵九十名守兵一百五十名康熙七年奉文改制守備一員把總一員馬戰兵三十三名官馬三十三匹步戰兵六十六名守兵二百三十一名在營差操爲城池倉獄防守其守備月支俸薪蔬菜燭炭心紅紙張等銀一十兩九錢四分九釐五毫自備馬四匹每匹月支銀一兩二錢把總月支俸薪銀三兩自備馬二匹每匹月支銀一兩二錢馬戰兵每名月支工食銀二兩每馬一匹月支銀一兩二錢步戰兵每名月支工食銀一兩五錢守兵每名月支工食銀

高安縣志

卷之九

兵防

二

一兩總計一年俸薪工食共支銀五千四百八十兩九錢九分四釐又馬步戰守共兵三百三十名每名月支米三斗共米九十九石每年共米一千一百八十八石坐派上高縣三分南米內支給雍正六年奉文添設把總一員又添外委把總一員分防上高縣汛至雍正十年改守備爲都司僉書仍止兼轄高安上高二縣汛都司員下把總一員外委把總一員額此外委一員乾隆四十六年奉文又添設額此外委一員共馬戰兵十八名步戰兵四十四名守兵一百六十五名嘉慶二十年奉文裁減步戰兵八名道光十一年奉文裁減馬戰兵一名守兵三名實在官兵共二百二十員名內高安水

塘二處高郵市撥守塘兵五名灰埠撥守塘兵五名陸塘三處高崗嶺撥守塘兵五名馬鞍嶺塘防改遷村前舖撥守塘兵五名大蟹舖撥守塘兵五名爲城守把總專汛上高縣撥防汛兵十九名水塘三處界埠撥防塘兵五名徐家渡撥防塘兵五名鎮渡撥防塘兵五名爲分防上高外委把總專汛額支經費都司僉書一員月支俸薪心紅蔬燭等銀十一兩七錢八分零養廉銀二十一兩六錢六分零自備坐馬四匹乾銀四兩八錢把總一員月支俸薪銀三兩養廉銀七兩五錢自備坐馬二匹乾銀二兩四錢外委把總一員月支餉銀二兩養廉銀一兩五錢官戰馬一匹乾銀一兩二錢兵米三斗戰馬一匹乾銀一兩二錢兵米三斗步戰兵三十六名每名月支餉銀一兩五錢兵米三斗守兵一百六十二名每名月支餉銀一兩兵米三斗總共月支俸薪餉乾等銀三百一兩九錢八分零養廉銀三十兩六錢六分零兵米六十五石四斗每歲共計應支俸薪餉乾銀三千六百二十三兩七錢九分零養廉銀三百六十八兩兵米七百八十四石八斗按查營冊班班可考承平日久當永著爲定例云

民兵保甲附

屯營卒旅之外有所謂民兵者原以供差遣而資捍禦

也民兵之制或由編僉或由召募其目有四曰機兵以習火器名曰弓兵以能射名曰捕兵以捕賊名皆計丁糧爲編僉其召募而充者曰民壯是擇勇勁之民使之練習在公以資防守與編僉之制名異而義同捕兵舊統于縣尉明代省縣尉之職以捕兵併領于州縣而弓兵則隸于巡檢司旣綜覈之又訓練之于以追捕盜賊伺察奸匪控御指揮無不惟命何患閭閻之不安堵也而尤莫善于保甲昔王守仁之撫江西也檄屬郡行十家牌法大小相維有功保障洵爲久遠良模我

國朝保甲之法歷經督撫大吏按地方情形酌定條規最爲簡便乾隆二十二年復責成道府督率州縣無分城市鄉村水陸居民及各色人等俱造具烟戶清冊每十戶爲一牌十牌爲一甲設立甲長牌頭保正令紳耆公舉點充示以專責諸凡例禁之事許其實心稽查秉公首報遇隣境有差緝逃匪緊件併許先行密同協捕有功則分別獎賞古謂之保甲兵是亦民兵類也夫以塘汛嚴津河之盤詰以壯快司奸宄之巡緝又復力行保甲以愆其防俾鄉保團練羣知仰承

熙朝除暴安民至意而恪守其良法則盜賊可息詞訟可簡禮樂可興一邑之治不勞而致而兵民相衛之實效乃不等于具文矣爰增是編以補兵防之所未竟

夫馬額數_附

羽書飛馳驛遞爲重故郵政與軍政相表裏高邑地當孔道差事之繁甚于他邑有驛馬亦有站夫二者缺一不可舊制額數過多歷經裁減額設差馬三十四站夫一百名雍正六年酌減站夫二十名馬仍其舊至乾隆二十四年將馬又裁減五匹現在額存二十五匹每匹每日草料銀八分共草料銀七百貳拾兩內扣小建銀拾貳兩額設馬夫七名每名每日工食銀叁分共銀七拾伍兩陸錢內扣小建壹兩貳錢陸分長養站夫捌拾名每名每日工食銀叁分共銀捌百陸拾肆兩內扣小建銀拾肆兩肆錢倘遇差務殷煩現存夫馬不敷使用臨時僱募應之于郵政未嘗無小補焉

舖兵額數

縣城設立總舖舖兵六名自縣而東至架橋舖十里舖兵四名架橋至瓦窰舖十里舖兵四名瓦窰至古樓舖十里舖兵四名古樓至大蟹舖十里舖兵四名大蟹至招山舖十里舖兵四名招山至新建縣界烏山舖十里舖兵四名此東路舖兵目也自縣而南至橫塘舖十里舖兵四名橫塘至塔前舖十里舖兵四名塔前至古良舖十里舖兵四名古良至苦竹舖十里舖兵四名苦竹至高崗舖十里舖兵四名高崗至清江縣界曲水舖十里舖兵四名此南路舖兵目也自縣而北至長溪舖二十里舖兵四名直送至奉新縣界烏崗嶺此北路舖兵

目也自縣而西至清水舖十里舖兵二名清水至上湖舖十里舖兵二名上湖至希嶺舖十里舖兵二名希嶺至龍口舖十里舖兵二名龍口至梅溪舖十里舖兵二名梅溪至華陽舖十里舖兵二名華陽至上高縣界界埠十里舖兵二名此西路舖兵目也總計大小一十八舖舖兵六十二名每名日給工食銀二分每年共工食銀四百四十六兩四錢遇閏加工食銀三十七兩二錢爰繼驛站而類載之以便稽覽

兵事

自秦漢以來無可考故始於隋

隋

大業十二年冬十二月鄱陽林士安稱楚帝據江南建
城人應智頊於華林山屯兵置柵保障一方唐武德五
年李大亮宣撫江南智頊歸命因表置靖州命爲刺史
歿祀爲城隍神焉

唐

乾符四年江西賊柳彥璋陷江州執其刺史陶祥高安
制置使鍾傳陷撫州 先是王仙芝猖狂江西大亂衆
推傳爲首乃鳩夷獠依山爲壁至萬人自稱高安鎮撫

高安縣志

卷之九

兵事

一

使至是彥璋掠撫州不能守傳入據之卽拜爲刺史中
和二年逐江西觀察使高茂卿據洪州卽以爲江西觀
察使旋擢團練使拜鎮南節度使封南平郡王至子匡
時始爲淮南所并

天祐六年

唐亡於四年晉歧淮南猶稱
唐號實則梁開平三年也

危全諷攻洪州

楚馬殷遣指揮使苑玫會袁州刺史彭彥章圍高安淮
南將周本與危全諷戰於象牙潭大敗之執全諷乘勝
克袁州執彥章行營都指揮使米至誠等敗苑玫於上
高

宋

紹興元年命張俊爲江淮路招討使岳飛副之二月曹

成黨馬友犯筠州守臣王庭秀棄城遁三月張俊趨豫章與楊沂中岳飛大敗馬進復筠州成聞進敗自引兵來遇於樓子莊又大敗之成勢迫絕江而去遂復江州張俊傳李成圍江州其黨馬進在筠州俊既入洪州馬進索戰由上流絕生米渡出賊不意追奔七十里至筠州賊背河而陣率步兵當其前以精騎授楊沂中陳思恭約於午時從山後來擊麇戰及期精騎自山馳下賊駭亂退走遂復筠州追至奉新北樓子莊成黨商元據草山挾險設伏俊遣步兵從間道直趨山椒殺伏奪險乘勝追至江州岳飛傳云李成將馬進犯洪州連營西山飛請於張俊曰賊貪而不慮後若以輕兵絕生米渡出不意破之必矣俊大喜因以爲先鋒飛重鎧躍馬潛出賊右突其陣所部從之進大敗走筠州飛抵城東賊布陣十五里飛先設伏以待選騎二百以紅羅爲幟上刺岳字騎從幟而前賊易其少薄之伏發敗走使人大呼曰不從賊者坐吾不汝殺坐而降者八萬進與餘卒奔南康飛夜引兵至朱家山斬其將趙萬成聞自引兵十餘萬來遇於樓子莊復大破之追斬進楊沂中傳云破馬進於玉隆觀追至筠州成自將十萬衆來援夾河而營沂中說俊曰彼衆我寡當以奇破之願以騎見屬公引步兵居前俊從之卽夜銜枚渡筠河出西山馳下俊步兵夾攻俘八千人

二年曹成擁衆由江西歷湖湘據道賀二州命飛權荆湖東路安撫都總管平之

三年春正月江西將李宗諒誘戍兵寇筠州遣統領趙進擊降斬之

開慶元年八月蒙古將兀良哈斛兵自黃州渡江至臨江軍知軍陳元桂死之遂入瑞州

德祐二年春正月元兵至瑞州知州姚巖棄城走安撫姚文龍及其將張文顯降於元

元

至元二十五年三月廣東賊董賢舉等七人皆稱大老聚衆反剽掠瑞撫龍興南安韶雄汀諸郡連歲擊之不

高安縣志

卷之九

兵事

三

能勝秋七月以連歲盜起免南安瑞贛三路逋稅

至正十一年冬十一月江西妖人鄧南木作亂攻瑞州總管禹蘇福擒斬之

十二年徐壽輝部將陶九陷瑞州總管禹蘇福萬戶張岳敗之 紅巾賊况普天陷瑞州縱火三日 天完將

李養成王普敬據華林山爲寇

十三年冬江西右丞火你赤以兵平富州臨江遂復瑞州擒况普天閔總管彭國玉併家屬無少長鬻之民應之者亦戮以徇

十八年陳友諒遣王奉國陷瑞州路

二十一年明太祖遣趙德勝廖永忠等分兵攻臨江瑞

州諸郡

明

正統十一年嚴雅則起所在爲患次年始平
宏治十五年江西盜起都御史林俊勦散之 江西新
昌民王武爲盜巡撫韓邦問不能靖命俊巡視俊身入
賊巢武請自効悉擒賊黨詔卽以俊代邦問
正德三年江西餘干姚源金乾七王浩八等盜起瑞饒
撫贛諸郡皆被擾

五年高安陳福一羅長一奉新胡雪二嘯聚郡界之華
林山連劫庫獄暨臨江奉新靖安建昌諸府縣脅從擄
質至萬人復分據越王瑪瑙仙女雞冠等寨官司且撫

高安縣志

卷之九

兵事

四

且捕惟華林賊尙熾

六年五月華林賊陷瑞州府劫庫獄六月再至通判姜
榮妾竇氏死之

七年四月按察司副使周憲攻華林賊於仙女寨拔之
進克雞公嶺先後擒斬千餘人進薄華林絕其出路賊
益窘先是陳金檄憲分三路討之憲信諜言輕進其二
路失期兵敗死之子幹亦死賊勢復振 六月南昌知
府李承勳會同按察司王秩督兵進攻承勳招賊帥黃
奇置麾下任用之奇誓効死乃令入巢寨招降其黨令
土酋岑猛選精兵五百人與俱至山下銜枚登山內應
者導至壘賊方酣睡拔柵入斫之賊倉猝求甲仗不得

斬首三千餘級餘衆奔匿至曉又搜斬千餘人賊遂平
建昌縣賊徐九齡聚醴源出沒江湖間都御史俞諫督
兵討之豐城知縣吳嘉聰率衆先登破袋嶺擒其從賊
顏曰和等二十一人餘衆衝高安主簿袁寶率兵遏之
賊敗走寶亦戰死

正德十四年甯王宸濠反南贛巡撫王守仁集兵樟樹
鎮通判胡堯元童琦率民兵自瑞州至

崇正十六年奉新干洲李粟十聚衆立寨調各屬官兵
會勦瑞營守備汪文鎮死於陣士卒死者六十餘人
冬十一月左良玉兵自武昌援袁州大隊駐瑞十餘日
時張獻忠犯袁州本府北城迎恩拱辰鍾秀三門俱

高安縣志

卷之九

兵事

五

築惟空阜城一門良玉遣部將來授自奉新進淫掠甚
於賊四鄉焚戮甚衆婦女多死節者先是部長欲縱兵
入城衆議斂資犒賞文學徐昌祚同司獄施以策詣軍
前調停兩城賴以安堵

國朝

順治二年乙酉冬下園劉氏嘯衆攻城官兵敗之
新昌副都御史陳泰來遣所部李凌虹提兵入萬載殺
我所置令杜章卿連陷新昌十二月遣子正議正儼往
他省自帥師東下金聲桓遣署驛傳道戴國士招泰來
而以大軍隨其後泰來出見國士不設備兵敗死黃氏
祠中其骨燼焉

舊志所載土寇攻城云云似卽指此

十二月土寇聚衆攻城省營湯楚二副將將兵五千來禦時以江西布政司監其軍頃刻賊營戰北

舊志

三年丙戌春二月土寇再集攻城城西放火署知府于日望同知崔琳通判文鳳翔推官康永綱分門堵守告急於省金聲桓發候唐二參將來援頃刻北竄同月真空和尚聚衆駐鷄籠嶺署縣羅向辰率兵敗之

五年金聲桓王得仁叛固山額真譚泰至委朱邦政守郡安輯之

八年同知張仁聲率瑞營守備劉成功哨官陳功勦秋陂阮等處殄賊數十人獲賊魁周池周老雷旭雷馘等餘黨逃散

高安縣志

卷之九

兵事

六

康熙五年四月二十二日夜有賊二十餘人自舟登岸近拱辰門處布梯踰城屠宿城傳籌烟夫六人從縣治後劫署及傷知縣韓玉衡越數日殞不犯庫獄次年獲盜魏仲卿李佺二等伏誅

十三年十月耿精忠叛於閩江西諸寇應之棚寇朱永勝由萬載攻新昌城陷十一月撫標右營遊擊佟國棟恢復是月復陷

十四年正月桑將軍由上高恢復新昌仍以佟國棟駐防六月奉調他往九月賊衆大至守備史得勝失守十二月撫標中軍吳友名游擊林科帥衆恢復

十六年冬總督董衛國親督大兵駐芳塘諸將帥師由

黃岡口達銅鼓營直抵湖南平江界賊始盪平

以上三條通志

但言新昌不及高安然一府所轄相距不百里又係孔道繹騷可知故並采入明宏治新昌王武一條亦同

咸豐三年六月粵逆洪秀全遣賊自長江入湖徑犯江西省城七月初三日分兵至瑞州踞七日而去 先是洪逆嘯聚粵西數年粵大吏不能制二年由永安州竄出圍攻湖南省城不克攻湖北省城陷之遂順流水陸夾江下陷安徽省城直陷江甯分兵入湖口犯江西署湖北臬司江忠源適帶兵至偕江撫張芾竭力防守相特九十餘日賊始退去九江總兵馬濟美死焉江省避兵者多以舟載孥入瑞河賊躡之至高郵市遇楚勇畧接仗卽至郡城城陷執知縣胡光輔於舟中後出南昌

高安縣志

卷之九

兵事

七

江殺之舟載多被掠賊據城七日一夜縱火焚府學及城隍廟忽登舟去

五年十月粵逆再犯江西府縣多陷一股合廣匪自新昌來踞府城六年湘勇官兵相繼至相持一年七年始攻克之賊仍半先遁 粵逆初次圍省城特鄱湖一路耳外府僅一至瑞州至是踞江甯已久北則山東河南山西直隸南則湖北安徽江蘇皆被擾閩浙戒嚴遂由陸路入江西諸府矣傳聞逆首石達開在新昌踞時已與廣東叛勇合而後至瑞統兵者僞檢點賴裕新也遂設僞總制比知府僞監軍比知縣迫脅士民勒派支應時臨江城亦同日陷鄰縣皆賊也六年七月統帶會國

華管帶湘勇劉騰鴻至就北城之西石鼓嶺爲營九江總兵普承堯管帶寶營繼至亦屯於石鼓嶺賊全隊收入北城逆首石達開嘗一至卽去僞北王韋昌輝亦一至湘勇出不意大敗之奪其傘轎諸寶物乘夜遁去湘勇俄渡河營於南城與普營南北犄角而賊始蹙矣時南北兩鄉各設局以作糧臺百姓踴躍捐助賊日夜坼城磚民屋治守具兵勇繼之民居市肆近北城者賊燬之近官兵營者官兵下令坼之遂無一椽片瓦存者次年賊益困各營兵勇攻益急今安徽布政司吳坤修又自奉新移屯東北賊知不可畱半已先竄矣七月十一日劉帥期卽日破城親出督戰爲飛礮所中卒於陣賊不知也越日遂復城竄者降者殲者無算此次將弁紳士死事最多方賊始至劉李二大令帶勇迎戰於城西全軍殺傷過半死最烈劉名希洛湖南人李名銀陝西人

十一年三月逆首僞忠王李秀成復竄江西瑞州又陷踞城至六月去李逆自吉安入臨江境叛目李金敷混號衝天礮者應之過臨江陷瑞州仍設僞監軍擾勒如前至六月聞李觀察元度鮑提督超先後將至乃大焚掠南竄去 初癸丑賊至住七日所擾惟典舖大家爲甚乙卯再至盤踞雖久惟以仇視官紳苛勒殷富以售其黠至此愈放手淫掠婦女死者無算丁壯老弱被擄

去者以數萬計盜賊之形窮益甚矣

同治甲子粵匪由安徽竄至撫建一帶四月鮑軍門率所部軍過瑞駐軍於城先後凡十日遂往臨江前勦人心始安

辛酉之賊擄去人最多甚至有一村餘丁一二十人者雖間有逃回亦甚寥寥同治甲子後次第收復江甯江蘇浙江官軍以舟舫載還及逃回者大約十之三四而已餘不可問也

陰岡嶺平賊記

陰岡爲瑞臨咽喉咸豐乙卯冬賊先後陷瑞臨據陰岡以通往來明年七月楚軍圍瑞當路欲斷臨援謀先平陰岡賊丁巳正月蕭觀察啟江督三軍由北路入賊迎戰大敗適南路官軍失利退賊併力來攻蕭軍奮擊大敗之越日復戰又敗之賊遂潰二月二十四日臨援賊大隊至蕭帥令田叅戎興恕軍於饒家橋東楊遊擊恒軍於上杭橋北自率果營立嶺西溪岸搭浮橋三以備進下流老賊首奪橋田叅戎截殺礮中坐騎軍少卻田厲聲曰今日我死日也易馬復進上流賊鋒又逼中軍毛守戎飛渡一矢殪其先鋒復發巨礮落其前旗戰甫合瑞營援兵突至與蕭軍四面夾擊不踰時而賊二十餘萬盡靡退至湛頭時官軍僅六千有奇夕四鼓復乘勝窮追賊出不意奔號踐蹈追入臨城始還乃二十九日賊復由員嶺寨入據上游計攻我偏師官軍偵得之伏兵以待賊至伏起胆落而逃自是賊不復能軍由新淦遁去官軍遂進逼臨郡云同治庚午邑人劉昕記